

# Ikajuttigedluta SanginiKatsiavugut.

Ikajuttigedluta SanginiKatsiavugut

PITJUTAUJUIT

## LABRADORIMI INUIT SAGVATAUSIMAJUIT NUNAIT ATTUTAUNITSANGINNUT AMMALU IKAJUTTAUGUTET ANGIKATIGEGUTINGA

Labradorimi Inuit Sagvatausimajuit Nunait Attutaunitsanginnut ammalu Ikajuttaugutet AngiKatigegutinga, atitâttausimajuk Canadamut ammalu Labradorimi Inuit katutjiKatigenninganut. Ilumiutalik kenaujanik, kuapatigut aulatsiKatigennimik, ammalu nunait atuttauKattajut uKautautillugit sunait attutauniKagajattut sakKititauppat sagvatausimajuit nunait ilingajuit nunanginni Inuit, ammalu sunait ikajotausot.

Una AngiKatigegutik taimailingagialik atâni allatausimajuit Labradorimi Inuit Nunamik Satusaijet AngiKatigegutingani. Satusaisimavut akungani Sagvatausimajuit Canadami ammalu Labradorimi Inuit katutjiKatigenninganut ilaujutsautillugit Labradorimi Inuit Sagvataumajuit Attutaunitsanginnut ammalu Ikajotet AngiKatigegutingani magguluatsiamagenni jârenni pijagettausimajuk.

UKautaujuit AngiKatigennimi ilautillugit:

- Akilettilugu Canada \$1 million dâlanik Nunatsiavut kavamanganut ulinnaitaukKulugit ammalu pivalliaKullugit pannaitaujuit Labradorimi Inuit namminilet kenaujaliugutinik atuKattaKullugit kenaujaliugutiugajattunik ilingajunik sagvatausimajuni nunani, ammalu sakKititsilutik kenaujanik ikajullugit Labradorimi Inuit ammalu Labradorimi Inuit namminilet kenaujaliugutinik atuKattagamut tamakkuni pivitsaujuni.

- SakKititsilutik kuapatigut aulatsiKatigennet angajukKauKatigetsanginnik uKautjigijajullutik federal AngajukKânganik Avatiligijini ilonnainik ilingajunik aulatsigiamut Torngait KakKasuanginni Sagvatausimajunik Nunanik Canadami. Tâna tallimanik-kiggatuttilik angajukKauKatigenik ilautitsiKattaniakKuk adjigetumik kiggatullutik tamâginnik Sagvatausimajunik Canadami kamajinik ammalu Nunatsiavut kavamanganik, ammalu itsivautaKallutik immigottumik tilijausimalluni tamâginnut katimajujonnut.
- Illumiutangit ingiggainaniattut atuttauKattajut Labradorimi Inunnut sagvatausimajuni nunani, allât tiguisongullutik ujaganik sananguagatsanik ammalu atuinnalutik ilusituKaminik jâri tamât aullâsimavimmini.
- Pitâgijaugialet ikajuttauKullugit Labradorimi Inuit atusonguKullugit kenaujatsasiunikkut pivitsaujunik sakKititaujuut nunatsualimâmi sagvatausimajuni nunani.
- Iitagijauulluni sagvatausimajuit nunait takutitsigunnaKullugu atuttausiasonguninganik Labradorimi Inuit piulimatsitillugit nunamiutanik, ullumi ilikKusinik taimanganit sagvatausimajutuinnaniungituk nunani, tâvatuak anginitsani avittusimajuni nunani.